

BATASUNAREN LEGEZ KANPORATZEA

INKESTA. Kale agerraldiaren aldeko atxikimendua jendaurrean azaldu duten zenbait pertsonaia publikok Bilbora batzeko deia egin dute, gutxieneko askatasunen errespetua galdatzeko

Maria Gonzalez-Iban Ocio | BILBO

«Oinarritzko eskubideak» aldarri

MAITE ARISTEGI
(EHNEko idazkari nagusi ohia)

«Herri baten barren-barreneko eskubideak urratzen ari dira»



Manifestazioan izango naiz herri baten barren-barreneko eskubideak urratzen ari direlako, eta erantzutea premiazko zaigulako. Euskaldunak garela eta bake eta etorkizun duina nahi ditugula esan behar diegu. Azkenaldion izugarritzko astakeriak gertatu dira, egunero funtsik gabeko erasoak abiatzen dituzte, eta ezin dugu isilik egon. Horregatik, oso garrantzitsua litzateke Bilbokoa manifestazio jendetsua izatea. Gezurren, aurreiritzien eta azpijokoen gainetik gaudela erakutsi behar dugu. Gainera, asko kostata lortu ditugun oinarritzko eskubideak ezin dizkigutela kendu aldarrikatuko dugu: biltzeko eskubidea, adierazpen askatasuna, pentsatzekoa eta iritziz ezberdina edukitzekoa... Manifestazioaren leloak berak herri moduan aurrera jotzeko borondatea badaukagula adierazten du. Herriaren nahia bakebidean defenditzea ezin digute ukatu. Azkenik, manifestazioa egitea eragotziko baligute, beste astakeria bat litzateke hori. Jaurlaritzari dagokionean, aurrekoa ez bazuten galarazi, orain ez litzateke batere jarrera ausarta epaile baten erabakiei men egitea.

ABELIN LINAZISORO (Aktorea)

«Legea eta eskubideak lehian izanik, eskubideen alde egin beharko luke Eusko Jaurlaritzak»



Bilboko manifestazioan egoitea berebizikoa da, ETaren aurkako borrokaren aitzakian faxismoa indar handiz datorkigulako berriro. Frankismoa dator, eta horri aurre egiteko, Euskal Herri osoak protesta egin behar du. Gurea nazio bat da, horregatik Bilbon *Gora Euskal Herria* oihukatzea garai bateko *Gora Euskadi Askatuta* goratzearen pareko izango da. Manifestazioak, gainera, balio behar du beste sektoreei ohartarazteko

hemen jende asko dagoela nazio moduan dauzkagun eskubideen alde borrokatzeko. Eta Jaurlaritzak protestaldia legez kanpo utziko balu, Madrilen morroi direla pentsatuko nuke. Legeak eta eskubideak lehian izanik, eskubideen alde jokatu beharko lukete.

LAURA MINTEGI (Idazlea)

«Aitaren etxea defenditu eta eraiki nahi dugu»



Legez kanpo utzita ere, manifestazioa egin beharra dago. Euskal gizarteak atzerapauso politiko ikaragarria jasan du azkenaldion. Orain *Gora Euskal Herria* esatea, nire aitaren etxea defendituko dut goratzea da. Baina guk aitaren etxea defenditu eta aitaren herria eraiki nahi dugu. Eta une honetan etxea zutik irauteko aldarrikapena egin behar dugu, horregatik batuko naiz Bilbora. Argi dago justizia sozialerako garai txarra dugula. Espainiako agintariak harrotuta dabiltza. Berez baziren faxistak, alabaina, egun publikoki esaten ari zaizkie bidea hori dela. Ildo horretatik, manifestazioak balio behar du gizarteak osteria ere Lizarra-Garaziko arora itzultzeko grina duela ozen aldarrikatzeko, politikarien laguntzarekin edo hura gabe.

KIRMEN URIBE (Idazlea)

«Herriak berak hartu behar du protagonismoa, botereari erakutsi badela nor erabakitze»



Espainiako Gobernuak hasitako ilegalizazio prozesuarekin ez nago ados. Oso oldarkor ari dira. Batasunari, eta, oro har, euskal gizarteari erasotzen diete. Gerra jarrera hartu dute, aurrekoari ez diote eskubiderik onartu nahi, desegin egin nahi dute. Gerra estrategia horrekin ez nator bat, eta horregatik bilduko naiz Bilbora. Gainera, guk gure bidea egiten dugula erakutsi behar diegu. Garzonek manifestazioa debekatu, eta jendeak aurrera jarraitzeko gogoa agertu izana oso positiboa iruditzen zait. Herriak berak hartu behar

du protagonismoa, botereari erakutsi behar dio badela nor erabakitze. Mugimendu soziala legearen aurretik doala azaldu behar dugu. Lege batzuk urratu egin behar dira gizarte hobe bat lortzeko. Bestalde, Bilbon batuko garenok Euskal Herria subjektu bat lege hartu behar dutela aldarrikatuko dugu. Alegia, ez dela zer baiten zatia.

TXILLARDEGI (Idazlea)

«Badirudi gerra bukatu berria dela, 1937an bezala gaude»



Deialdia sinatu arren, ezin izango naiz gaur Bilbon egon. Kanpora joan behar dut. Bestela, han egongo nintzatekeen, jakina!

Dena den, bihotzez egongo naiz Bilbon. Euskal Herrian faxismo betean gaude, ez da fase bat. Gutxienez, faxismoaren atarian. Batasunaren legez kanporatzea ez zait batere harrigarria iruditzen, egunero gertatzen ari baitira sekulakoak. Badirudi gerra bukatu berria dela. 1937an bezala gaude, Bilbon sartu zirenean bezala, hain zuzen. Gainera, edozein demokraziatan eskubide sakratua den manifestatzeko askatasuna ez du errespetatzen Espainiak. Beraz, euren legeak ere ez dituzte betetzen. Mila aldiz esan dute ETA desegina dagoela, gizarteak ez diola inolako babesik ematen... Orain, berriz, ETAk manifestaziorik jendetsuenetarikoa bat antolatu duela esan dute.

HUR GOROSTIAGA ('Le Journal' egunkariko zuzendaria)

«Alde guztiek elkarrekin hitz egitea behar du Euskal Herriak»



Gaur Bilbon izango naiz, Batasuna legez kanporatzeak bakea urruntzen duela uste dudalako. Alde guztiek elkarrekin hitz egitea behar du Euskal Herriak, eta ez batzuk bazter uztea. Horren ildotik, Baltasar edo Jose Maria bezalako en atzean, Espainian Franco oraindik bizirik dagoela ikusi dugu. Bestalde, manifestazioa debekatzeko es-

katzen duen Garzon epailearen autoarekin jarraituz, horren hurrengo pausoa litzateke manifestazioan parte hartuko dugun milaka eta milaka herritarrok atxilotzea. Hala ere, Garzon helburua hori bada, jai dauka!

KOLDOBIKA JAUREGI (Eskultorea)

«Daukagun Jaurlaritzak ezertarako balio ez duela ikusi dugu»



Batasuna legez kanporatzeak ez duela ezer konpontzen uste dut. Ilegalizatu arren, jendea ez da desagertuko. Gainera, ezin daiteke manifestaziora deitu zutenak edo gure atxikimendua adierazi diogunok ETAdetatzat jo, Garzon azken autoak ezartzen duen lege. Epaile horrek zer egin behar dugun eta zer ez zehaztu nahi du. Euskaldunok gure auzia konpontzen ez badugu, zertarako behar dugu Madrilgoek kontu horretan muturra sartzea? Legebiltzarra, Jaurlaritza eta bestelako erakundeak bagenituela uste genuen. Geroago, konturatu gara Madrildik etorri daitezkeela gure taldeak legez kanpo uztera. Orduan, daukagun Jaurlaritzak ezertarako balio ez duela ikusi dugu.

PAKO ARISTI (Idazlea)

«Bide judizial bat hastea beti da politikaren porrota»



Frankismo kirats ikaragarria ekarri du Batasuna legez kanpo uzteak. Inozoa banaiz ere, ez nuen uste Europan horrelakorik gerta zitekeenik. Kapitalismo basati baten menpe bizi den kontinentea izan arren, itxuraz, behintzat, legeak eta eskubideak dezente errespetatzen direlako.

Bestetik, bide judizial bat hasten denean, beti da politikaren porrota. Porrot bikoitza agertzen du gertaera honek. Indar espainolistek, EAEko hauteskunde autonomikoak galdu ostean, han irabazi ez zutena honela irabazi nahi dute. Indar abertzaleetako politikoen porrota ere agerian utzi du, hemen

dagoena konpondu eza. Espainiako herriak nahi duena ari dira egiten politiko espainolistak; Euskal Herriko politikoak, aldiz, ez dira inondik inora egiten ari euskaldunek nahi dutena. Gainera, Espainia mailako indar ezkertiarren porrota ere bada, gutxieneko eskubideen alde borrokatu beharko bailukete.

Manifestazioa ETAk deituta dela adierazi du Garzonek, eta horrek guri barregura ematen digu, barregura tristea. Gauzak aldatzeko boterea baitu Garzonek. Hala ere, psikiatriko batean amaituko duela ziur nago.

GONTZAL MENDIBIL (Kantaria)

«Pentsamendua librea izan behar duen sentimendua da, eta ezin dakioke hegorik moztu»



Larunbat honetan, *Gora Euskal Herria* lelopean izango den manifestaziorako atxikimendua adierazi nahi dut neuk ere. Oinarritzkotzat izan beharko genukeen eskubidea dugu adierazpen eskubidea, eta ezin uler daiteke zer nolatan ukatu daitekeen berau. Pentsamendua librea izan behar duen eta izan beharko duen sentimendua baita, eta ezin dakioke hegorik moztu. Horregatik, bada, doakizue nire atxikimendua.

DORA SALAZAR (Eskultorea)

«Begi bistakoa da ezin daitekeela alderdi politiko bat legez kanpo utzi»



Ez dut uste alderdi politiko bat legez kanpo utz daitekeenik, eta, horregatik, manifestaziorako nire atxikimendua iragarri nuen, nahiz eta lan kontuengatik ezin gudan joan. Nire planteamenduetan ez naiz muturrekoa, baina begi bistakoa iruditzen zait alderdi bat ezin dela legez kanpo utzi. Askatasuna galtzeaz gain, egoerak okerrera egingo duela uste dut neurri horrekin. Garzonek kaleratutako azken autoari dagokionez, deialdia bi pertsonen egin zutela iruditzen zait.